


# **Kām Mukammal Ho Gayā**

**Al-Masīh kī Maut**



*kām mukammal ho gayā hai. al-masīh kī maut*

**It Is Finished. The Death of Al-Masih**

by Bakhtullah

*[Ao, Khud Dekh Lo 34]*

(Urdu—Roman script)

© 2024 [www.chashmamedia.org](http://www.chashmamedia.org)

*published and printed by*

Good Word, New Delhi

The title cover is derived from R. Gunther  
<https://www.freebibleimages.org/illustrations/ls-passover/>.

Bible quotations are from UGV.

*for enquiries or to request more copies:*

**askandanswer786@gmail.com**

## **Fahrist**

<b>Salīb</b>	<b>1</b>
<b>Yahūdiyōn kā Bādshāh</b>	<b>2</b>
<b>Kapṛōn kī Taqsīm</b>	<b>3</b>
<b>Mariyam kī Fikr</b>	<b>3</b>
<b>Pyās</b>	<b>5</b>
<b>Kām Mukammal Ho Gayā Hai</b>	<b>8</b>
<b>Chhedā Huā Pahlū</b>	<b>9</b>
<b>Yūhannā kī Pakkī Gawāhī</b>	<b>11</b>
<b>Masīh Najāt Dene Wālā Lelā Hai</b>	<b>14</b>
<b>Masīh Pāk Karne Wālā Chashmā Hai</b>	<b>15</b>
<b>Dafn</b>	<b>17</b>
<b>Injīl, Yūhannā 19:16b-42</b>	<b>19</b>

## Salīb

Yahūdī rāhnumāon ke uksāne par Romī governor Pilātus ne hukm diyā ki Īsā Masīh ko salīb par charhāyā jāe. Tab use salīb pakaṛā dī gaī aur faujī us ke sāth chal paṛe. Dūsri Anājil is ke gawāh hain ki Īsā Masīh koṛon ke bāis kāfī kamzor ho gayā thā. Rāste meñ uskī tāqat jawāb de gaī. Tab faujiyon ne ek guzarne wāle ko yih lakaṛī uṭhākar le jāne par majbūr kiyā.

Chalte chalte wuh shahr se nikalkar sazā-e-maut kī jagah par pahuñch gae. Jagah kā nām khopaṛī thā. Yih shahr kī chārdīwāri ke qarīb hī thī jahān se log tamāshā dekh sakte the. Wahān faujiyon ne use salīb par charhā diyā. Us ke bāen aur dāen hāth unhoñ ne do mujrimon ko maslūb kiyā.

► *Maslūb karne kā kyā tariqā thā?*

Faujī, hāthoñ aur pānwoñ meñ baṛe kīl  
ṭhoñkkar mujrim ko salīb se laṭkā dete the.

## **Yahūdiyoñ kā Bādshāh**

Itne meñ Pīlātus ne ek taḡhtī banwākar use Īsā  
Masīh kī salīb par lagwā diyā. Taḡhtī par likhā  
thā, ‘Īsā Nāsari, Yahūdiyoñ kā bādshāh.’ Bahut-  
se Yahūdiyoñ ne yih paṛh liyā, kyoñki yih maqām  
shahr ke qarīb thā aur yih bāt Arāmī, Lātīnī  
aur Yūnānī zabānoñ meñ likhī thī. Yih dekhkar  
rāhnumā imāmoñ ne etarāz kiyā, “Yahūdiyoñ  
kā bādshāh’ na likheñ balki yih ki ‘Is ādmī ne  
Yahūdiyoñ kā bādshāh hone kā dāwā kiyā.’”

Pīlātus ne jawāb diyā, “Jo kuchh mainne likh diyā  
so likh diyā.”

► *Pīlātus kyoñ aṛā rahā?*

Pīlātus zālīm thā, aur use unheñ diqqat  
pahuñchāne meñ mazā ātā thā. Lekin anjāne  
meñ us ne is taḡhtī se ek gahrī haqīqat kā elān  
kiyā.

► *Us ne kis haqīqat kā elān kiyā?*

Yih ki Īsā Masīh sachmuch bādshāh hai. Wuh is duniyā meñ āyā tāki pahle Yahūdiyon aur phir pūrī duniyā kā bādshāh bane.

### **Kapṛon kī Taqsim**

Īsā Masīh ko salīb par chaṛhāne ke bād faujiyon ne us ke kapṛe lekar chār hisson meñ bāñṭ lie, har faujī ke lie ek hissā. Yih bhī ek Romī riwāj thā. Lekin choḡhā be-joṛ thā. Wuh ūpar se lekar niche tak bunā huā ek hī ṭukṛe kā thā. Islie faujiyon ne kahā, “Āo, ise phāṛkar taqsim na karen balki is par qurā ḍāleñ.” Yon Zabūr kī yih peshgoī pūrī huī, “Unhon ne āpas meñ mere kapṛe bāñṭ lie aur mere libās par qurā ḍālā.”

► *Is peshgoī kā zikr kahāñ huā thā?*

Yih peshgoī Zabūr 22:18 meñ pāī jāti hai. Yih zabūr al-Masīh kī taklifdeh maut kī peshgoī kartā hai.

### **Mariyam kī Fikr**

Kuchh aurateñ Īsā Masīh kī salīb ke qarīb khaṛī thīñ—uskī māñ, uskī ḡhālā, Klopās kī bīwī

Mariyam aur Mariyam Magdalīnī. Īsā Masīh ne apnī mān ko us shāgird ke sāth khare dekhā jo use pyārā thā. Us ne kahā, “Ai khātūn, dekheñ āpkā beṭā yih hai.” Us shāgird se us ne kahā, “Dekh, terī mān yih hai.” Us waqt se us shāgird ne Īsā Masīh kī mān ko apne ghar rakhā.

► *Yih kaun-sā shāgird thā jo use pyārā thā?*

Be-shak yih Yūhannā rasūl thā jis ne Injil kā yih bayān likhā.

► *Us ne apne nām kā zikr kyon nahīn kiyā?*

Ham andāzā lagā sakte haiñ ki wuh bhī Yahyā baptismā dene wāle kī-sī soch rakhtā thā jis ne farmāyā thā ki Masīh barhtā jāe jabki maiñ ghaṭṭā jāūñ (Yūhannā 3:30). Wuh nām-dām kamāne ke chakkar meñ nahīn ānā chāhtā thā.

► *Īsā Masīh ne Mariyam aur shāgird se yih bāt kyon kī?*

Maut ke rūbarū bhī use Mariyam kī fikr thī. Wuh chāhtā thā ki yih shāgird uskī dekh-bhāl kare.

## Pyās

Is ke bād jab Īsā Masīh ne jān liyā ki merā mission takmīl tak pahuñch chukā hai to us ne kahā, “Mujhe pyās lagī hai.” Is se bhī Zabūr kī ek peshgoī pūrī huī.

► *Kaun-sī peshgoī pūrī huī?*

Ek zabūr meñ likhā hai,

Unhoñ ne merī k̄hurāk meñ karwā  
zahr milāyā, mujhe sirkā pilāyā jab  
pyāsā thā.

(Zabūr 69:21; bamuqābalā Zabūr 22:15)

► *Yūhannā yih bāt kyon bayān kartā hai?*

Pahle, wuh kahnā chāhtā hai ki yih peshgoī pūrī huī. Lekin is se baṛhkar wuh in tamām dukhī bātoñ se is par zor denā chāhtā hai ki Masīh ne sachmuch saḳht dukh uṭhāyā. Salibī maut ke kuchh sāl bād chand-ek ḡhalat ustād kahne lage the ki aisī azīm hastī dukh nahīñ uṭhā saktī. Un ke k̄hyāl meñ wuh sirf dekhne meñ dukh uṭhā rahā thā.



Yūhannā farmātā hai ki hargiz nahīn! Ẹhudā ke Farzand ne insān bankar hamārī jagah dukh sahā tāki hameñ najāt dekar apnī bādshāhī meñ shāmil kare. Lāzim thā ki wuh pūre taur par Ẹhudā bhī ho aur insān bhī. Agar wuh sirf Ẹhudā hotā to wuh apnī jān insān kī jagah na de saktā. Aur agar wuh sirf insān hotā to insān ko uskī qurbānī se koī matlab na hotā. Yih bāt ġhalat hai ki wuh sirf Ẹhudā hai. Wuh pūre taur par insān bhī hai. Maiñne apnī āñkhoñ se dekhā ki wuh maut tak dukh uṭhā rahā thā.

Mere dost, yih bāt sachche imān kā buniyādī satūn hai. Sachchā shāgird wuhī hotā hai jo yih bāt māne. Sachchā shāgird jāntā hai ki maiñ apnī najāt Ẹhud hāsil nahīn kar saktā. Sirf Ẹhudā kā Farzand jo pūre taur par Ẹhudā aur pūre taur par insān hai mujhe yih najāt dekar nūr meñ lā saktā hai. Merā is meñ koī hissā nahīn hai.

Is buniyādī soch se hamārā īmān duniyā kī har dūsri soch se farq hai. Najāt milne ke lie hameñ pahle hathiyār ḍālkar mānanā parṭā hai ki ai Masīh, tū hī sab kuchh hai. Main apnī hī tāqat se najāt hāsil nahīn kar saktā. Terā hī nūr mujhe badal saktā hai.

► *Achchhā, āp yih bāt nahīn mānte?*

Mere azīz, apne irdgird dekho. Kyā ek nazar sābit nahīn kartī ki sab ke sab ṭeṛhe-meṛhe haiñ? Sab ke sab gunāh meñ phañse hue haiñ. Yih bāt alag ki har ek apne āpko ṭhīk-ṭhāk aur achchhā insān samajhtā hai chāhe wuh kitnā jhūṭh kyon na bole, kitnī be-īmānī kyon na kare. Jitnā koī Ḳhudā kī qasm khāe utnā hī wuh mashkūk nikaltā hai. Jitnā koī kar dikhāe ki main barā farishtā hūñ utnā hī wuh hote hote shaitān sābit hotā hai.

Sirf aur sirf Ḳhudā hamārī hālat badal saktā hai. Sirf Īsā Masīh kī sachchāī, uskā nūr, uskā abadī pānī aur abadī roṭī ham meñ tabdilī lā saktī hai.

- *Kyā wajah hai ki sirf Īsā Masīh ham mein tabdilī lā saktā hai?*

Wajah yih hai ki hamārī apnī koshisheñ bakwās hī haiñ. Sirf wuh jo achchhā charwāhā hai ham mein pakkī tabdilī lā saktā hai.

### **Kām Mukammal Ho Gayā Hai**

Qarīb mai ke sirke se bharā bartan parā thā. Unhon ne ek sponge sirke mein ḍubokar use zūfe kī shāḳh par lagā diyā aur uṭhākar Masīh ke muñh tak pahuñchāyā. Jo abadī zindagī kā sarchashmā hai use ghaṭiyā qism kā sirkā pilāyā gayā. Yih sirkā pīne ke bād wuh bol uṭhā, “Kām mukammal ho gayā hai.” Aur sar jhukākar us ne apnī jān Allāh ke supurd kar dī.

- *Kaun-sā kām mukammal ho gayā thā?*

Najāt kā kām mukammal ho gayā thā. Īsā Masīh ko duniyā mein bhejā gayā thā tāki wuh maut aur gunāh par fath pāe, insān ko nūr mein lāe. Use duniyā mein bhejā gayā thā tāki wuhī sazā uṭhāe jo insān ko uṭhānī thī. Jo kām insān kar

nahīn pātā wuh us ne kiyā. Jo us par īmān lātā hai us ke gunāh miṭāe jāte haiñ, aur wuh Ḳhudā ko mañzūr ho jātā hai. Yoñ Masīh kī maut uskī anokhī ḳhidmat kā urūj thī. Aisā kām duniyā nahīn samajh saktī. Uskī nazar meñ yih hastī fail ho gai. Sirf wuh jo īmān lāyā hai is kām kī qadr kar saktā hai.

► *Yih bāt kahne ke bād Īsā Masīh ne kyā kiyā?*

Us ne apnī jān apne Bāp ke supurd kī.

► *Is se ham kyā sīkh sakte haiñ?*

Marte waqt ham bhī jo us ke shāgird haiñ apnī jān us ke supurd kar sakte haiñ. Tab ham sīdhe uskī god meñ ā jāeñge jo hamārā achchhā charwāhā hai. Ḍarne kī zarūrat nahīn hai, kyonki uskī bheṛeñ maut ke pār bhī mahfūz rahtī haiñ.

## **Chhedā Huā Pahlū**

Taiyārī kā din yānī jumā thā, aur agle din Īd-e-Fasah kā āghāz thā. Islie Yahūdī nahīn chāhte the ki lāsheñ agle din tak salībōñ par laṭkī raheñ.

Unhoñ ne Pilātus se guzārish kī ki wuh un kī ṭāngeñ turwākar unheñ salīboñ se utārne de.

► *Ṭāngeñ turwāne se kyā hotā thā?*

Ṭāngeñ turwāne se jism ko pāñwoñ se sahārā nahīn miltā thā aur dam jald hī ghuṭ jātā thā.

Faujiyoñ ne dūsre do mujrimoñ kī ṭāngeñ toṛ dīñ, pahle ek kī phir dūsre kī. Jab wuh Īsā Masīh ke pās āe to unhoñ ne dekhā ki wuh faut ho chukā hai. Islie unhoñ ne uskī ṭāngeñ na toṛīñ. Lekin tasallī pāne ke lie ki wuh sachmuch mar gayā hai ek ne neze se uskā pahlū chhed diyā. Zaḳhm se fauran ḳhūn aur pāñī bah niklā.

► *ḳhūn aur pāñī bah nikalne kā kyā matlab thā?*

Iskā matlab thā ki wuh sachmuch mar chukā thā. Sciencedān kahte haiñ ki jo insān thoṛī der pahle mar gayā ho us ke pahlū se ḳhūn aur pāñī nikal saktā hai. Zindā insān se sirf ḳhūn nikaltā hai aur kuchh der se mare hue insān se thoṛā hī nikaltā hai.

## Yūhannā kī Pakkī Gawāhī

Yūhannā rasūl farmātā hai,

Jis ne yih dekhā hai us ne gawāhī dī hai aur uskī gawāhī sachchī hai. Wuh jāntā hai ki wuh haqīqat bayān kar rahā hai aur uskī gawāhī kā maqsad yih hai ki āp bhī imān lāen.

(Yūhannā 19:35)

► *Yih gawāh kaun thā?*

Be-shak yih gawāh Yūhannā rasūl thā jo apne āqā kī salīb ke qarīb hī kharā thā.

► *Wuh is par itnā zor kyon detā hai ki main is maut kā gawāh hūn?*

Iskā zikr ho chukā hai ki kuchh ḡhalat ustād inkār karne lage the ki Ḳhudā kā Farzand dukh uṭhā saktā hai. Un kā kahnā thā ki Īsā Masīh nahīn marā. Isī lie Yūhannā is par bhī zor detā hai ki Mariyam dūsri jānī-pahchānī auraton samet salīb ke bilkul qarīb thīn jab Īsā Masīh mar gayā. Dūsri Anājil is ke gawāh hai ki

aur aurateñ bhī kuchh dūr khaṛī sārā māmālā dekhtī rahīñ. Ham andāzā lagā sakte haiñ ki bahut-se log shahr kī moṭī moṭī chārdīwārī par khaṛe sab kuchh dekh rahe the, kyonki yih chārdīwārī nazdik hī thī. Iskā zikr ho chukā hai ki yih log salīb kī taḥtī par likhī bāt paṛh sakte the (Yūhannā 19:20).

Yūhannā ke bayān se sāf zāhir hotā hai ki Īsā Masīh ke lie bachnā nāmumkin hī thā. Sārā intazām Romī faujiyon ke hāth meñ thā, aur salīb par yon kīlon se laṭkāne se chance hī nahīn thā ki wuh bach jāe. Yūhannā farmātā hai ki merī gawāhī sachchī hai. Maiñ jāntā hūñ ki maiñ haqīqat bayān kar rahā hūñ.

► *Sachchāī kī yih bāt kis kī yād dilātī hai?*

Yih Īsā Masīh kī yād dilātī hai jo sachchāī kā bādshāh hai aur jis ne Pīlātus ke sāmne is sachchāī, is ṭhos wafādārī par zor diyā thā. Sachche shāgird ko is se pahchānā jātā hai ki wuh sachchāī boltā hai.

► *Yūhannā kī gawāhī kā kyā maqsad hai?*

Maqsad yih hai ki sunane aur paṛhne wāle īmān lāeñ. Injīl kā pūrā maqsad yahī hai ki insān Ḳhudā ke Farzand Īsā Masīh par īmān lākar najāt pāe.

► *Yih bāt itnī ahm kyōñ thī ki Masīh ke pahlū se ḳhūn aur pānī bah niklā?*

Yūhannā iskā jawāb detā hai,

Yih yoñ huā tāki Kalām-e-Muqaddas kī yih peshgoī pūrī ho jāe, “Uskī ek haḍḍī bhī toṛī nahīñ jāegī.” Kalām-e-Muqaddas meñ yih bhī likhā hai, “Wuh us par nazar ḍāleñge jise unhoñ ne chhedā hai.” (Yūhannā 19:36-37)

Yūhannā do peshgoiyāñ bayān kartā hai jo pūrī huīñ.

► *In do peshgoiyōñ kā kyā matlab hai?*

Pahlī bāt,



## Masīh Najāt Dene Wālā Lelā Hai

Pahlī peshgoī K̄hurūj kī kitāb meñ likhī hai:

Yih khānā ek hī ghar ke andar khānā hai. Na gosht ghar se bāhar le jānā, na lele kī kisī haḍḍī ko toṛnā.

(K̄hurūj 12:46)

► *Yih kis qism kā khānā hai?*

Yih wuh khānā hai jo Isrāīliyoñ ne Misr se nikalne se pahle pahle khāyā. Jab Misr ke bādshāh ne unheñ chhoṛne se inkār kiyā to K̄hudā ne farmāyā ki main Misr ke har pahlauṭhe ko mār ḍālūngā. Lekin merī qaum is se bach saktī hai. Bachne kā yih tariqā hai: Har gharānā ek lelā zabah kare. Phir zūfe kā guchchhā lele ke k̄hūn meñ ḍubokar wuh yih k̄hūn chaukhaṭ par lagā de. Jab halāk karne wālā farishtā wahāñ se guzregā to wuh yih k̄hūn dekhkar aise ghar ke pahlauṭhoñ ko chhoṛegā. Lele ko usī rāt bhūnkar khānā hai, lekin uskī haḍḍiyōñ ko mat toṛnā.

Bād meñ yih khānā har sāl manāyā jātā thā. Īd kā nām Fasah kī Īd thī. Isī īd ke pahle din Īsā Masīh maslūb huā. Jab wuh salīb par laṭkā huā thā us waqt shahr meñ Īd ke lele zabah kie jā rahe the.

- *Yih bāt ki lele kī haḍḍiyāñ toṛī nahīñ jātī thīñ kis tarah Īsā Masīh meñ pūrī huī?*

Īsā Masīh Fasah kā haqīqī lelā hai. Lele kī tarah uskī haḍḍiyāñ toṛī na gāīñ hālāñki dūsron kī ṭāñgeñ toṛī gāīñ. Ek aur bāt bhī is taraf ishārā kartī hai: Zūfe kī shāḅh par sponge lagākar use sirkā pilāyā gayā. Yih zūfā us zūfe ke guchchhe kī taraf ishārā hai jis se ghar ke chaukhaṭ par ḅhūñ lagāyā jātā thā. Ġharz Īsā Masīh wuh haqīqī lelā hai jis kā ḅhūñ ilāhī adālat se chhuṛātā hai. Dūsri bāt,

### **Masīh Pāk Karne Wālā Chashmā Hai**

Dūsri peshgoī Zakariyāh nabī kī hai. Us meñ ḅhudā ne farmāyā,

Maiñ Dāūd ke gharāne aur Yarūshalam ke bāshindoñ par mehrbānī aur iltamās kā Rūh unḍelūngā. Tab wuh mujh par nazar ḍāleñge jise unhoñ ne chhedā hai, aur wuh us ke lie aisā mātām kareñge jaise apne iklaute beṭe ke lie. (Zakariyāh 12:10)

Nabī wuh zamānā bayān kar rahā hai jab Isrāīl al-Masīh ko pahchān legā. Tab wuh uskā mātām kareñge jise unhoñ ne chhedā thā. Phir nabī farmātā hai,

Us din [...] chashmā kholā jāegā jis ke zariye wuh apne gunāhoñ aur nāpākī ko dūr kar sakeñge. (Zakariyāh 13:1)

Matlab hai ki us lele se ek chashmā kholā gayā jis ke zariye har imān lāne wāle ke gunāhoñ aur nāpākī ko dūr kiyā jāegā.

Ġharz, jab ḵhūn aur pānī us ke pahlū se bah niklā to is se ek gahrī haqīqat zāhir huī: Masīh wuh lelā

hai jis kā ḵhūn hamen ilāhī adālat se chhurātā hai. Sāth sāth Masīh abadī zindagī kā wuh chashmā hai jis kā pānī hamāre gunāhoñ aur nāpākī ko dūr kartā hai.

## Dafn

Bād men Arimatiyāh ke rahne wāle Yūsuf ne Pilātus se Masīh kī lāsh utārne kī ijāzat māñgī. Ijāzat milne par wuh āyā aur lāsh ko utār liyā.

► *Arimatiyāh kā rahne wālā Yūsuf kaun thā?*

Dūsri Anājil is ke gawāh haiñ ki yih Yūsuf Yahūdī adālat-e-āliyā kā amīr aur izzatdār rukn thā. Wuh Masīh kā shāgird bhī thā magar ḵhufiyā taur par, kyonki wuh Yahūdī rāhnumāoñ se ḍartā thā. Wuh Masīh ko sazā-e-maut dene ke ḵhilāf thā. Ab us ne lāsh ko dafnākar baṛī mardānagī dikhāi.

► *Nīkudemus bhī sāth thā. Nīkudemus kaun thā?*

Wuh ek izzatdār ālim thā jo Īsā Masīh se rāt ke waqt milā thā (Yūhannā 3). Ek mauqe par jab Yahūdī rāhnumā Masīh ke ḵhilāf bāteñ karne

lage to us ne uskā difā kiyā thā (Yūhannā 7:50-52). Yih do jāne-pahchāne ādmī bhī is ke pakke gawāh the ki Īsā Masīh sachmuch mar gayā thā. Nīkudemus apne sāth mur aur ūd kī taqrīban 34 kilogram ḡhushbū lekar āyā thā. Sirf amīr ādmī yih ḡharīd saktā thā. Janāze kī rasūmāt ke mutābiq unhoñ ne lāsh par ḡhushbū lagākar use paṭṭiyon se lapeṭ diyā.

► *Lekin lāsh ko kahāñ dafñ karnā thā?*

Sabat yānī hafte kā din qarīb thā, kyonki Yahūdī hisāb se wuh jume kī shām se shurū hotā thā. Us din lāsh ko kahīñ uṭhākar le jānā mushkil thā. ḡhushqīsmatī se salīboñ ke qarīb ek bāḡh thā, aur bāḡh meñ ek naī qabr thī jo ab tak istemāl nahīñ huī thī.

► *Yih qabr kaisī banī thī?*

Yih qabr chaṭṭān meñ tarāshā huā ḡhār yānī guphā thī jis kī ek dīwār meñ ek qism kī baṛī shelf tarāshī gaī thī. Isī shelf par lāsh ko rakhā gayā.

Phir barā patthar ghār ke muñh par luḥkāyā gayā. To bhī Yahūdī rāhnumā mutma'in na the. Us par mohr lagākar unhoñ ne qabr par pahredār muqarrar kie. Unheñ ḍar thā ki shāgird lāsh ko chhīn leñge.

Kyā Injil kī is jagah par Yūhannā ko 'ḵhatm shud' nahīn likhnā chāhie thā? Īsā Masīh guzar gayā thā, shāgird ḍar ke māre bikhar gae the. Jo log pahle uskī tārīf meñ nāre lagāte wuh ab himmat hārkar apne apne ghar chale gae the.

Is sawāl kā jawāb agle bāb meñ milegā.

### **Injil, Yūhannā 19:16b-42**

Chunāñche wuh Īsā ko lekar chale gae. Wuh apnī salīb uṭhāe shahr se niklā aur us jagah pahuñchā jis kā nām khopaṛī (Arāmī zabān meñ Gulgutā) thā. Wahāñ unhoñ ne use salīb par chaḥā diyā. Sāth sāth unhoñ ne us ke bāeñ aur dāeñ hāth do aur ādmiyoñ ko

maslūb kiyā. Pīlātus ne ek taḥṭhī banwākar use Īsā kī salīb par lagwā diyā. Taḥṭhī par likhā thā, ‘Īsā Nāsarī, Yahūdiyon kā bādshāh.’ Bahut-se Yahūdiyon ne yih paṛh liyā, kyonki maslūbiyat kā maqām shahr ke qarīb thā aur yih jumlā Arāmī, Lātīnī aur Yūnānī zabānon meñ likhā thā. Yih dekhkar Yahūdiyon ke rāhnumā imāmon ne etarāz kiyā, “Yahūdiyon kā bādshāh’ na likheñ balki yih ki ‘Is ādmī ne Yahūdiyon kā bādshāh hone kā dāwā kiyā.’”

Pīlātus ne jawāb diyā, “Jo kuchh mainne likh diyā so likh diyā.”

Īsā ko salīb par chaṛhāne ke bād faujiyon ne us ke kapṛe lekar chār hisson meñ bāñṭ lie, har faujī ke lie ek hissā. Lekin choḡhā be-joṛ thā. Wuh ūpar se lekar niche tak bunā huā ek hī ṭukṛe kā thā. Islie faujiyon ne kahā, “Āo, ise phāṛkar taqsīm na karen balki is par qurā ḍāleñ.” Yon Kalām-e-Muqaddas kī yih peshgoī pūrī huī, “Unhon ne āpas meñ mere

kapre bānt̄ lie aur mere libās par qurā ḍālā.”

Faujiyoñ ne yahī kuchh kiyā.

Kuchh ḡhawātīn bhī Īsā kī salīb ke qarīb khaṛī thīn: uskī māñ, uskī ḡhālā, Klopās kī bīwī Mariyam aur Mariyam Magdalīnī. Jab Īsā ne apnī māñ ko us shāgird ke sāth khaṛe dekhā jo use pyārā thā to us ne kahā, “Ai ḡhātūn, dekheñ āpkā beṭā yih hai.”

Aur us shāgird se us ne kahā, “Dekh, terī māñ yih hai.” Us waqt se us shāgird ne Īsā kī māñ ko apne ghar rakhā.

Is ke bād jab Īsā ne jāñ liyā ki merā mission takmīl tak pahuñch chukā hai to us ne kahā, “Mujhe pyās lagī hai.” (Is se bhī Kalām-e-Muqaddas kī ek peshgoī pūrī huī.)

Qarīb mai ke sirke se bharā bartan paṛā thā. Unhoñ ne ek sponge sirke meñ ḍubokar use zūfe kī shāḡh par lagā diyā aur uṭhākar Īsā ke muñh tak pahuñchāyā. Yih sirkā pīne ke bād Īsā bol uṭhā, “Kām mukammal ho gayā



hai.” Aur sar jhukākar us ne apnī jān Allāh ke supurd kar dī.

Fasah kī taiyārī kā din thā aur agle din Īd kā āghāz aur ek k̄hās Sabat thā. Islie Yahūdī nahīn chāhte the ki maslūb huī lāsheñ agle din tak salīboñ par laṭkī raheñ. Chunāñche unhoñ ne Pilātus se guzārish kī ki wuh un kī ṭāngeñ tuṛwākar unheñ salīboñ se utārne de. Tab faujiyoñ ne ākar Īsā ke sāth maslūb kie jāne wāle ādmiyoñ kī ṭāngeñ toṛ dīñ, pahle ek kī phir dūsre kī. Jab wuh Īsā ke pās āe to unhoñ ne dekhā ki wuh faut ho chukā hai, islie unhoñ ne uskī ṭāngeñ na toṛīñ. Is ke bajāe ek ne neze se Īsā kā pahlū chhed diyā. Zaḥm se fauran k̄hūn aur pānī bah niklā. (Jis ne yih dekhā hai us ne gawāhī dī hai aur uskī gawāhī sachchī hai. Wuh jāntā hai ki wuh haqīqat bayān kar rahā hai aur uskī gawāhī kā maqsad yih hai ki āp bhī imān lāeñ.) Yih yoñ huā tāki Kalām-e-Muqaddas kī yih peshgoī pūrī ho jāe,

“Uskī ek haḍḍī bhī torī nahīn jāegī.” Kalām-e-Muqaddas meñ yih bhī likhā hai, “Wuh us par nazar ḍāleñge jise unhoñ ne chhedā hai.”

Bād meñ Arimatiyāh ke rahne wāle Yūsuf ne Pilātus se Īsā kī lāsh utārne kī ijāzat māñgī. (Yūsuf Īsā kā ḵhufiyā shāgird thā, kyoñki wuh Yahūdiyoñ se ḍartā thā.) Is kī ijāzat milne par wuh āyā aur lāsh ko utār liyā. Nīkudemus bhī sāth thā, wuh ādmī jo guzre dinoñ meñ rāt ke waqt Īsā se milne āyā thā. Nīkudemus apne sāth mur aur ūd kī taqrīban 34 kilogram ḵhushbū lekar āyā thā. Yahūdī janāze kī rasūmāt ke mutābiq unhoñ ne lāsh par ḵhushbū lagākar use paṭṭiyōñ se lapeṭ diyā. Salīboñ ke qarīb ek bāgh thā aur bāgh meñ ek naī qabr thī jo ab tak istemāl nahīn kī gaī thī. Us ke qarīb hone ke sabab se unhoñ ne Īsā ko us meñ rakh diyā, kyoñki Fasah kī taiyārī kā din thā aur agle din Īd kā āghāz thā.